



Arte di Palabra 2021 ta bek y awor tambe cu Rap



Arte di Palabra 2021 ta tuma luga dia 6 di maart na Cas di Cultura.


Skirbimento creativo ta un instrumento valioso di enseñansa di idioma materno, pa motibo cu e ta aporta na desaroyo emocional y cognitivo di e hoben den desaroyo. Skirbimento creativo ta yuda e hoben descubri su mes, siña con pa expresa su mes y su sentimentonan, banda di laga e hoben ta activo cu literatura y lesamento na un manera spontaneo.

Den caso di Arte di Palabra, prosa (cuenta) y poesia (poema) ta e dos generonan literario cu ta central den e competencia, den cual na un manera dinamico ta expone un obra skirbi creativamente.

Poesia

- A. Poesia existente, obra di otro autor; alumno di klas 1 y 2
- B. Poesia original, skirbi pa e alumno mes; alumno di klas 1 y 2
- C. Poesia original, skirbi pa e alumno mes; alumno di klas 3 – 6 / EPI

Cuenta cortico (maximal-



mente 1 A4)

D Cuenta existente, obra di otro autor; alumno di klas 1 y 2

E. Cuenta original, skirbi pa e alumno mes; alumno di klas 1 y 2

F. Cuenta original, skirbi pa e alumno mes; alumno di klas 3 – 6 / EPI

Di e forma aki Arte di Palabra ta duna balor na nos idioma Papiamentu den scol pa medio di literatura di hoben pa hoben. Cada tanto tempo ta amplia e categorianan mas purbando asina na duna mas hoben e posibilidad pa participa den e competencia.

Algun aña atras a haci esaki cu e categoria di Haiku y awor ta bay haci esaki cu Rap.

Ya tabatin un biaha caba cu algun hoben espontaneamente a skirbi un Rap pa participa den e competencia. Na e momento ey e competencia mes no tabatin e cate-

goria Rap, pues e opcion mas factibel tabata pa laga e Rap forma parti di e categoria di poesia original.

Danki na e desaroyo tecnologico cu tambe a aporta na nos competencia, awor si por tin Rap bek den Arte di Palabra y como un categoria riba su mes. Rap, un categoria nobo, cu no ta nada mas cu un forma liber di expresion di opinion y/of huicio via di ritmo uzando generalmente frase cu ta rima.

Regla: Categoria G y H: Rap

Rap ta consisti di 2 categoria: G: alumno di klas 1 y 2 y H: alumno di klas 3 te cu 6 y MBO klas 1 y 2.

Participacion por ta individual of den duo. E Rap mester ta skirbi door di e participante(nan) mes of un alumno di mesun categoria di klas, pues un obra original. E obra mester tin un mensahe

of expresion di un realidad di bida y ta uza na tur momento palabra decente y completamente na Papiamentu (uzo di expresion di slang di hoben ta aceptabel).

Na momento di inscripcion e participante(nan) ta entrega 2 material:

E letra riba papel

Un grabacion audio di Rap (formato MP3)

E grabacion mester ta un presentacion no edita. Por uza beat existente pero mester menciona na momento di entrega letra cu e beat ta existente y di ken e ta, esaki pa e parti di derecho di autor y plagio (esta copia un obra existente caba di un otro autor). Ta recomendabel pa tuma contacto cu e creador di e beat pa su autorisacion, prome cu haci uzo di esaki.

Duracion di e Rap ta maximalmente 3 minuut, cual ta loke e hurado lo evalua.

E participante(nan) no por uza papel pa lesa for di dje durante e presentacion. Ta haci apelacion riba e docente pa yuda controla si realmente e Rap ta original. Preferibel laga e alumno traha esaki den klas.

Na momento di inscribi e obra, e alumno(nan) ta duna Arte di Palabra permiso pa por uza y publica e obra pa uzo no comercial.

Ganado di cada categoria di Poesia, Cuenta y Rap lo presenta den final di Arte di Palabra ABC, cu lo tuma luga na Aruba dia 12 di juni 2021, cu publico segun e posibilidad actual. Ultimo dia pa entrega di obra ta dia 19 di februari 2021, por manda esaki via bo docente di Papiamentu of via e-mail: artedipalabra@gmail.com

ORANJESTAD (AAN): Departamento di Cultura Aruba bou di auspicio di Ministerio di Cultura y cu sosten di Funadacion di Corector Papiamentu, ta organisa for di 2009 e proyecto anual Arte di Palabra. Arte di Palabra ta un competencia literario na Papiamentu pa scolnan secundario y avansa.

E competencia di